



Naleraq

31.august2021

UKA2021/59

Inatsisartut Suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

Tasiilami eqqaanilu, Ittoqqortoormiini nannuttassat ukiunut tulliuuttunut nalilersoqqinnissaa aammalu inoqarfiup eqqaani inuillu najugaqarfiisa akornanni nannut pulasut inoqarfinnullu qallisimasut toqqaannaq toqunneqartalernissaannut, aammalu asimi piniariarfinnut inuit akornannut pisut toqunneqartalersinnaanissaat pillugit apeqquteqaat aallaavigalugu oqallisissiasatut siunnersuut

(Inatsisartunut ilaasortaq Emanuel Nûko; Naleraq)

Kangiani Tasiilami eqqaanilu taamatullu Ittoqqortoormiini nannuttassat ukiuni arlaqalersuni allanngortinneqarsimangillat, Tasiilami eqqaanilu 25, Ittoqqortoormiini 35. Amerlineqarnissaat pisariaqarluinnalersimavoq, ukiunimi kingullerni nannut amerliartornerujussuat malunnarsigaluttuinnarpoq.

Takussutissaalersimapput inoqarfimmut nannut qalligaluttuinnartut, sionatigummi nannunniartarneq inoqarfik qimallugu ullorpassuit atorlugit ungasissumut nannunniartoqartarpoq ullutsinnili inoqarfimmut qalligaluttuinnarnerata peqatigisaanik nannut inoqarfimmut qallingaarmata ungasissumut nannunniartoqassaarsimavoq.

Nannut pisassallu nungoreernerisa nalaanni nannunik inoqarfiit iluanni qimaatitsisarneq ulluinnarsiutaasalersimalluni. Upernaakkut aasakkullu ilaatigullu qimaatinneqartaraluartut inoqarfinnut utertuartarput, tamannalu inuit najugartut eqqarsaatigalugit aarlerinarluinnartarluni toqqissimanangilluinnartarlunilu pingaartumik meeqqat utoqqaallu eqqarsaatigalugit. Tamannalu aamma silarluttumi kaperlattumilu inunnut ulorianartorsionermik kinguneqartitsisarluni.

Tasiilami eqqaanilu pisassat 25-niik 35-mut qaffanneqarnissaat taamatullu Ittoqqortoormiini 35-niik 50-nut amerlineqarnissaat kaammattuutigaarput nannut amerligaluttuinnarsimanerannut takussutissat makku ilagaat; inoqarfinnut nannut qalligaluttuinnarnerat, inoqarfiup eqqaani qimaatitsisarnerit amerligaluttuinnarnerat, aammalu ungasissumulluunnit massakkut nannunniartoqassaarnikummat.

Nannut inoqarfiup eqqaannut qaninneruleraangata toqqaannaq toqunneqartalernissaannut kaammattuivugut, pisassat nungukkaluaraangata ukiunilu tulliuuttuni pisassat innarlerneqanngikkaluarlutik nannut inoqarfiup eqqaannut qallisimasut ingerlaannartumik toqunneqartalernissaat perusunnarpoq taamatullu toqunneqareernerani innuttaasunut utoqqarnullu agguanneqartarnissaat aqqittariaqarpoq.

Nannut amerligaluttuinnarneranni pingaaruteqarpoq inoqarfinnut qallinnginnissaat, nanoq uumasooq qaasuttuuvoq assullu navianartuulluni inunnillu ajoqusiisoqannginnissaa pillugu inoqarfimmut qaninnerulerpata ingerlaannaq toqunneqartassaaq, inuiqatigiinni nanoqarfiusumi toqqissisimanarnerusumik silamiittarnissaq eqqarsaatigalugu.

Nanoq ataasinnaappat, nannut marloqqaappata pingajoqqaappataluunniit piaartumik toqunneqartarnissaat pissusissamisoortutut isigaarput, innuttaasut navianartorsiunnginnissaat eqqarsaatigalugu.

Sammisamut partii allat isumaat tusarnissaat qilaanaaraarput.

Oqallilluarisi.